



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.343/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Kymete Kicaj-kryesuese, Hidajete Gashi Alaj dhe Arsim Hamzaj anëtarë, duke vendosur përkitazi me ankesën e Xhavit Murati, kandidat i pavarur për kryetar për Komunën e Prishtinës, të paraqitur kundër KQZ, për shkak të parregullsive gjatë numërimit në Qendrën Komunale të Numërimit (QKN) ne Prishtine për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 27.10.2025, merr këtë:

V E N D I M

HEDHET E PASAFATSHME ankesa ZL.Anr.343/2025, datë 24.10.2025, e parashtruar nga Xhavit Murati kandidat i pavarur për kryetar për Komunën e Prishtinës të paraqitur kundër KQZ, për shkak të parregullsive gjatë numërimit në Qendrën Komunale të Numërimit (QKN) ne Prishtine ,për Zgjedhjet Lokale, të mbajtura më datë 12 Tetor 2025.

A r s y e t i m

Me datën 24.10.2025, PZAP-i ka pranuar ankesën e kandidatit të pavarur për kryetar për Komunën e Prishtinës, me të cilën pretendon se ka dyshime që ka pasur manipulime gjatë numërimit të fletëvotimeve (votat), ku shumë persona janë të gatshëm për këtë parregullsi të deklarohen personalisht tek KQZ, OSBE, Prokurori dhe Gjykatë. Tutje, parashtruesi i ankesës shton se pavarësisht numrit të votave se sa do jenë në përfundim, kërkon verifikimin dhe korrigjimin e fletëvotimeve në vendvotimet e cekura: shkolla “Hasan Prishtina”, shkolla “Elena Gjika”, shkolla “Dardania”, Fakulteti Teknik, shkolla “Pavarësia” dhe disa qendra të tjera brenda qytetit të Prishtinës.

Në përgjigjen në ankesë të Komisionin Qendror të Zgjedhjeve – KQZ, sqaron se bazuar në nenin 101 të Ligjit Nr. 08/L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr. 16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më 01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN.Rezultatet preliminare nga vendvotimet mund korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN). Bazuar në Rregullën Zgjedhore Nr.13/2024 Rezultatet Zgjedhore nenin 9 paragrafi 1 thekson se: Në rast të mospërputhjes së rezultateve, KQZ-ja mund të urdhëroj rinumërimin e votave të cilit do VV, ose edhe përsëritjen e votimit në një VV apo QV. Rezultatet përfundimtare të procesit zgjedhor, shpallën nga KQZ-ja pas përfundimit të numërimit të të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta;

fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të gjitha procedurave në QNR, ku rezultati i publikuar është i ankimueshëm nga subjekte politike dhe kandidatët të cilët kanë pretendime në raport me numërimin e votave të tyre. Pra, në momentin e publikimit të rezultateve përfundimtare nga KQZ-ja, palët e pakënaqura në pajtim me nenin 105 të LZP, pala mund të ushtrojë ankesë në afatin brenda dyzet e tetë (48) orëve në PZAP.

Andaj, pas analizimit të lëndës është vërejtur se pala ankuese ankesën e ka paraqitur jashtë afatit ligjor për paraqitjen e ankesës, sepse aktiviteti i QKN-së është përmbyllur me datën 18.10.2025 ndërsa pala ankesën e ka parashtruar me datën 24.10.2025. Pra nuk është brenda afatit ashtu siç parashihet me nenin 105, par.1 të LZP. Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar. Në kuptim të nenit 117 par.3 të LZP-së, gjatë shqyrtimit të ankesës pala nuk ka bashkangjitur prova të mjaftueshme që do të mund të dëshmonin apo mbështesnin pretendimet e saj të paraqitura në ankesë.

Gjithashtu, KQZ njofton se i gjithë materiali zgjedhor duke përfshirë edhe kamerat e sigurisë, pas përfundimit të gjithë procesit të punës së QKN i njëjti material zgjedhor dorëzohet nga QKN në Qendrën e Numërimit dhe Rezultateve-QNR dhe të njëjtat mund të verifikohen dhe hetohen nga PZAP dhe organet e drejtësisë.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës konstaton se:

- Ankesa është e pasafatshme

PZAP pas shqyrtimit të shkresave të lëndës, ankesës së ankuesit, përgjigjet se dhene nga KQZ-se konstatoi se parashtruesi i ankesës ka dorëzuar ankesën me datë 24.10.2025, ku ka pretenduar se ka pasur parregullsi në numërim të votave, ndërsa sipas përgjigje nga KQZ dhe Provave të Bashkangjitura procesi i numërimit në Qendër Komunale është përmbyllur me datë 18.10.2025.

Me dispozitën e nenit 105 paragrafi 1, në mënyrë decitive parashihet se *"Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar," të Ligjit Nr. 08/L-228 për Zgjedhjet e Përgjithshme në Republikën e Kosovës. Nga kjo kuptohet se ankesa është dorëzuar pas afatit të paraparë ligjor.*

Me dispozitën e nenit 9 paragrafi 5 të Rregullores Nr. 01/2025 për Procedurat e Parashtrimit dhe Vendosjes së Ankesave të PZAP-it, parashihet që *" Personi mund të paraqes ankesë në PZAP, brenda dyzet e tetë (48) orëve për shkeljet e pretenduara",* ndërsa nën paragrafi 5.16. parashihet që *"Për shkeljet e pretenduara gjatë procesit të administrimit dhe numërimit në QKN dhe QNR".*

Neni 13, paragrafi 3, nën paragrafi 3.2 i Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, parasheh që: *"PZAP-i e hedhë ankesën kur vlerëson se ajo nuk është dorëzuar në afatin e paraparë ligjor."*

PZAP konstatoi se nga përgjigja e KQZ është vërtetuar se aktiviteti i QKN-së në Komunën e Prishtinës, është përmbyllur më datë 18.10.2025, ndërsa ankesa është parashtruar ne PZAP me dt. 24.10.2025 me çka vërtetohet se ankesa e ankuesit është parashtruar pas gjashtë ditëve respektivisht nuk është paraqitur brenda afatit ligjor prej 48 orëve, ashtu siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës.

Paneli, ka gjetur se ankesa e parashtruar nga kandidati i pavarur për kryetar në Komunën e Prishtinës Xhavit Murati, për shkak të parregullsive në numërim të votave, është parashtruar pas afatit ligjor të përcaktuara me dispozitën ligjore të lartëcekur, andaj PZAP vendosi që ankesa e ankuesit të hedhet si e pasafatshme.

Nga arsyet e theksuara më lartë dhe duke u bazuar në nenin 105 paragraf 1 i LZP-së, nenit 117 paragrafi 3, dhe nenit 118 paragrafi 1 të Ligjit Nr.08/L-228 Për Zgjedhjet e Përgjithshme në Republikën e Kosovës lidhur me nenin 9 paragrafi 5 nën paragrafi 5.16, nenin 13, paragrafi 2, neni 13 paragrafi 3 nën paragrafi 3.2 të Rregullës 01/2025 për Procedurat e Parashtrimit dhe Vendorsjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.343/2025, datë 27.10.2025

Kryesuese e Panelit

Kymete Kicaj



KËSHILLA JURIDIKE: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.